

# Herritik kanpo ere, XAKELARI

**B**estela ere ohituta daude Eibarko Klub Deportiboko xake batzordeko ordezkariak atzerriko torneotan parte hartzera. Italian, Hollandan eta Frantzian jardundakoak ditugu herriko xakelariak. Kirol horrek eskatzen duen kontzentrazioari jarraituta, ikasketetan ere lortzen dute balio bera garatu eta aurrera egitea. Horrela, une honetan Haritz Garro Chicagon dago, Edu Olabe Argentinan, Asier Etxagibel Suedian eta Jon Trebiño Luxenburgon, laurak ere klubeko xakelari onenen artean daude. Laurek dute berezitasun bat: euren ohiko eginbeharretik kanpo ere xakeari eusten diotela, gehienek bizi diren tokietako klubetan jarduteko. Zaletasunak ez dio mila kilometrotako distantziari errepartzen!

**Haritz Garrok** Chicagoko NorthWestern Unibertsitatean jarraitzen ditu bere ikasketak eta bertako taldearekin hartu izan du parte Chicago Chess Leaguen. Ez parte hartu bakarrik, final handian Chicagoko taldekako xake ligako txapela ere jantzi baitzuen. Estatu Ba-

tuetako energia handiko fisika laborategian jokaturako lehia horretan partida guztiak irabazi zituen bere taldeak. **Jon Trebiñok**, bestalde, Luxenburgoko Federazio Kopa irabazi zuen Gambit Bonnevoie bere taldearekin finalean Differdange taldeari irabazita. Trebiñok lanean dihardu bertan eta dagoeneko luxenburgotar moduan agertzen da FIDE Xakeko Nazioarteko Federazioaren zerrendetan. Klub Deportibora bueltatzen denean atzerritar moduan fitxatu beharko dute akaso. **Asier Etxagibel** arrasatearra bertako Arrasate-Arlutz taldeko jokalaria da, baina urteak dira "lagata" Eibarko klubarekin jokatzen duela; aurren, gainera, xake arloko Eibarko Kirol Saria jaso zuen gabon zahar egunean. Suediako Västeras herrian dihardu master bat egiten eta Suediako ligaren Mendebaldeko 1. mailako taldearekin jardun du. **Edu Olabe** Australiar izan zen iaz lan egiten, Sidneytik gertuko hiri batean eta Sidney Hiriko Txapelketan hartu zuen parte. Eibartarra ez da geldirik egotekoa eta aurren Argentinan dugu.



*Eibarko Hiria xake torneo jokatzeko da urtero sanjuanetan. Argazkian, azken edizioko irabazleak; ezkerrean, Mikel Larreategi xakelaria.*

## Taldekako ligan sartuta

Irailean hasita, zazpi-zortzi asteburu irauten duen Gipuzkoako banakako txapelketa egin eta gero, hilabete honetan taldekako liga txapelketari ekin zioten Klub Deportiboko xake talde biek. Mikel Larreategi batzordeko ordezkariak bigarren taldean jokatzen du eta, horrez gain, epailea ere bada, hainbat torneotan jardundakoa. Berak azaldu digunez, pozik daude gaur egungo egoeraz eta itxaropentsu begiratzen diote orain dela aste bi hasitako ligari: *"Gure taldeak azken denboraldian igo zuen lehenengo mailara eta mailari eutsiko diogulakoan gaude"*. Xabier Beorlegi, Emilio Freire, Jose Antonio Garrido eta Mikel Baena izan ditu lagun Larreategik jokatutako bi jardunalditan. Jon Aranek eta Diego Ol-

mok txandatu egin dira eta jardunaldi batean preferente edo maila goreneko taldearekin eta bestean 1. mailakoarekin jokatuko dute. Iaz denboraldi bikaina egin zuen lehen taldearekin, bestalde, Julen Garrok, David Perezek eta Jon Esturok jokatuko dute bi jardunaldiotan, eta laugarren jokalaria Olmo izan da batean eta Arana bestean. Jokatutako jardunaldi bietan, Eibar A-k 1,5-2,5 irabazi zion Donostian Easo B-ri eta bina berdindu Eibarren Baionarekin; Eibar B-k, bestalde, bina berdindu zuen Hernanin bertako A taldearekin eta, lehia gogorrean, 1,5-2,5 galdu zuen Idiazabal A-rekin Deporren.

Harrobia ere ondo zaintzen dute xake batzordekoek eta, Larreategik dioen moduan, *"xake eskolan 10 laguneko bi talde daude, astean ordu batean dihardutenak"*. Taldeak osatuta badaude ere, interesatuek barixaku arratsaldetan jo dezakete Deporren. Kontzentziorako kirol aproposa dugu xakea, *"partida ofizialak 3-4 ordu irauten dute-eta"*.



**Izadi**  
LORADENDA

- Lora eta landare natural eta lehorrak
- Ezkontzetarako lorak

San Juan, 1 Tel. 943 20 33 29

**Radio Eibar**  
CADENA SER  
104,0 FM

**DESCUBRE-TÉ**

Teak, kafeak, txokolatuek, ezta... eta baxera bereziak!!

Probaleku, 4 - Bis (ERMUA) 943 03 15 81  
descubrenew@hotmail.es www.teteriadescubre-te.com